

置酒會罷使士拔劍擊之劍旁下師古曰不正下也狂王傷上

馬馳去其子細沈瘦師古曰瘦音搜會兵圍和意昌及公主於

赤谷城數月都護鄭吉發諸國兵救之廼解去漢遣中

郎將張遵持醫藥治狂王賜金二十斤采繒因收和意

昌係瑣從尉犁檻車至長安斬之車騎將軍長史張翁

留驗公主與使者謀殺狂王狀主不服叩頭謝張翁捽

主頭罵詈師古曰捽持其頭音材兀反主上書翁還坐死副使季都

別將醫養視狂王狂王從十餘騎送之都還坐知狂王

當誅見便不發下蠶室初肥王翁歸靡胡婦子烏就屠

狂王傷時驚與諸翎侯俱去居北山中揚言母家匈奴